

明
詩
紀
事

明詩紀事

貴陽陳田輯

丙籤

彭韶一首

韶字鳳儀莆田人天順丁丑進士授刑部主事歷員外郎中出爲四川按察副使遷按察使再遷廣東布政使改貴州擢右副都御史巡撫應天改順天永平召爲刑部侍郎尋兼僉都御史巡視浙江兼理鹽法改吏部進刑部尙書卒贈太子少保諡惠安有從吾滯稿十二卷

四庫總目韶正色立朝歸然耆舊其文雖沿臺閣之體而醇深雅正具有根柢不同於神瘡而貌腴

今言方遜志在翰林魏任時薦西楊西楊修實錄乃
謗方叩頭乞餘生彭惠安公哀江南詞敘述建文死
義之臣至方遜志乃云後來奸佞巧言自粉飾叩
頭乞餘生無乃非直筆蓋指西楊輩修實錄書方再
三叩頭乞生者非實事也
蘭陔詩話惠安詩風骨峻整氣味醇厚

魏孔淵太守送岑嘉州集書數韻復之

岑嘉州眞名流生平浩氣橫清秋詞源瀕洞傾枚鄒春江曉
漲蛟龍浮從班解秩不復收從軍直到海西頭胡沙三載踏
驂騑長安萬里空悠悠間關西赴五馬侯郎官御史青幕遊
蜀嘉山水增清幽夜夜文光煥斗牛嘉州嘉州知不憂遺文
淪落人重修當時炙手勢莫傳至今寧有姓名留

王克復一首

克復字師仁福清人天順丁丑進士授刑部主事歷

員外郎中出爲江西參政歷湖廣按察使江西布政使擢右副都御史巡撫應天遷南吏部侍郎

吳門懷古

昔日館娃處繁華空故邱楓橋霜落夜茂苑月明秋響屨青苔沒香涇錦纜收傷心歌舞地一任麋鹿遊

周謨一首

謨字守謨新淦人天順丁丑進士累官陝西按察副使有東臯集

寓舍舒懷

春風浩蕩捲晴沙幾日行人未到家料得東臯桃李樹已應開到二分花

左贊二首

贊字時翊南城人天順丁丑進士授吏部主事歷員外郎中出爲浙江參政遷廣東布政使有桂坡集

書史會要左贊書法兼諸體尤精於隸得二蔡筆意

遊從姑山

勝境重來又十年山中風景故依然危崖俯瞰雙江水石竇微開一綫天夾道松筠晚翠隔城樓閣倚晴煙白鷗波外浮雲淨目送飛帆到日邊

徐貫一首

貫字原一瀋安人天順丁丑進士授兵部主事歷員外郎中出爲福建參政遷布政使改山東擢副都御

史巡撫遼東召爲工部侍郎進尙書加太子太保卒
贈太保諡康懿有餘力稿

蒜嶺驛別張序班

驛路相逢又相別客邊送客若爲情東風也解離人意故遣
飛花線旆旌

虞勣一首

勣字舜臣海鹽人天順己卯舉人

登鷹阿頂贈松崖道人

道人結屋懸崖巔蒼松百尺蟠屋前凌空怪石根半露巢鶴
老樹藤相纏層巒醉踏苔雲滑洞門長嘯蘿月圓借君九節
碧玉杖同探崑崙十二天

王佐一首

佐字廷用福州中衛人天順己卯舉人授桐廬訓導

改鄒平教諭有三留稿

靜志居詩話廷用宮怨詩芙蓉帳冷減容光愁倚熏籠嬾著牀寒氣逼人眠不得鐘聲催月下迴廊曹能始十二代詩采之游用之夢焦詩話謂南齊伯毛舜臣留守南都濶掃舊內見別院牆壁多舊宮人題詠年久剝落不可辨識其一署曰媚蘭仙子書卽此詩末二句也當出好事者傳會不然裕陵定都北京之後康陵未南巡以前安有宮人以廷用詩書之南內壁乎

上清宮留飲

羽僊邀我飲流霞不覺松梢日已斜鶴背洞簫歸路晚一聲

吹落碧桃花

張潛一首

潛字哲之閩人天順己卯舉人授饒平知縣有孝友
堂遺稿

宮詞

金箔微開埽玉牀離宮初度水風涼月華滿地笙歌沸未信
今宵更漏長

張元禎 一首

元禎字廷祥南昌人天順庚辰進士選庶吉士授編
修進左贊善擢南侍講學士進學士遷南太常卿兼
學士掌詹事府事擢吏部侍郎入東閣典誥敕天啟
初追謚文裕有東白先生集二十四卷

漫興

吾聞唐虞時明目達四聰如何後來世自作瞋與矇致令天下情默默不能通撫卷三嘆息颯颯來天風

陳煒 一首

煒字文耀閩人叔剛子天順庚辰進士授監察御史遷江西按察副使進布政使有恥菴集十卷

宿茅山觀

息影茅山陽林昏月初上樹古虬影蟠風迴葉聲響客夢不成憩孤懷共誰賞緬惟故山雲無由謝塵想

黃孔昭 一首

孔昭初名曜以字行改字世顯黃巖人天順庚辰進士授工部主事進員外郎改吏部進郎中擢右通政

遷南工部侍郎嘉靖中贈禮部尙書諡文毅有定軒集

田按文毅官吏部最有名嘗與謝鳴治輯台人詩爲赤城集六卷許廷慎李長民諸人詩皆賴以傳

遊山寺

山隱招提境人穿松柏林鐘聲出樹遠塔影到池深掃葉分僧石聽猿坐竹陰禪關秋草滿索寞向誰吟

陳選一首

選字士賢臨海人天順庚辰進士授監察御史擢河南按察使進廣東布政使

雨阻

篷響聞雨至淅然生旅愁遙尋晚林磬暫駐寒塘舟窗下一

僧老林間曲徑幽誰言阻行者翻使得佳遊

邢順二首

順字致和東莞人天順庚辰進士授兵部主事遷戶部郎中出爲江西參政謫石阡知府遷山西參政進

江西布政使有巽川集十六卷

田按致和守石阡撰石阡志十卷以才敏稱文守嘗遊鎮遠西峽山與興隆周布政瑛倡和布政有句云忽聞黃太使詩句落黔中其爲黔人傾慕如此

登臨江清風樓

晚涼公事暇乘興一登樓雲氣千山雨松聲萬壑秋隄平芳草合天遠大江浮日暮行人少空橫野渡舟

野塘秋景

翡翠鴛鴦各有情
映波毛羽最分明
玉樓金殿何須問
且了閒塘一段清

鄭紀一首

紀字廷綱仙游人天順庚辰進士改庶吉士授檢討
歷國子祭酒南左通政太常卿戶部侍郎進本部尙
書致仕有東園文集十四卷詩集十二卷

遊鳴峯巖

清絕梅峯下溪南第一山
客尋流水到僧伴白雲間
松子撲琴響藤花點硯斑
雖居浮世上卻自異人間

彭教一首

教字敷五吉水人天順甲申第一人及第授修撰進

侍講有東瀧遺稿四卷

麓堂詩話曩時諸翰林齋居閉戶作詩有僮僕窺之見面目皆作青色彭敷五以青字韻嘲之幾致反目予爲解之有曰擬向麻池爭白戰瘦來雞骨豈勝拳聞者皆笑

月印龍潭

一月在天心影落寒潭底閒撫曲闌干問龍何日起

陸鈇

三首

鈇字鼎儀崑山人榜姓吳天順甲申第二人及第授編修歷修撰右春坊右諭德擢太常少卿兼侍讀有

春雨堂稿三十卷

懷麓堂集鼎儀詩調高古盡去濃豔當所得意縱筆揮灑刻意極力者顧追之而不可及尤嗜書清勁可愛麓堂詩話張滄洲享父陸靜逸鼎儀少同筆硯未第

時皆有詩名享父天才敏絕而好爲精鍊奇思硬語
閒見墨出人莫提其鋒鼎儀稍後作而意識超詣拔
高徑超擢落塵俗筆力所至有不可形容之妙雖或
矯枉過正弗恤也二人者若天假之年其所成就不
知到古人何等地步而皆不壽以死豈不重可惜哉
詩談陸欽九霄之禽翩然高舉莫測其意向
藝苑危言陸鼎儀如吃人作雅語多在咽喉間
田按陸鼎儀張亨父詩均爲茶陵所稱許鼎儀有清
裁而力弱不能自舉

戲簡文量

樽前誰遣雪兒歌司馬風情晚更多銀蠟影偏人已醉紫檀
聲斷興如何歸來尙想桓伊笛醒後空慚學士波戲問韋娘
今健否青樓元自不曾過十月二十八日子與文量晚酌朱
觴夜深風冽琵琶屢斷而懋暹處懋暹以教坊弟子王秀侑
拍清歌數曲中有所謂學士波者余不解文量哂之曰此方
言也文量醉甚戲問秀杜韋娘安否
秀茫然無以對因相與撫掌而罷云

次韻答亨甫

水繞城園二萬家市門潮落露寒沙橋憐白塔吟風葉路憶
新隄卧雨花自媿兒童辭邑里每因朋舊惜年華他時歸卧
吳江上應借滄洲十頃霞

白塔亨甫屋邊橋新隄余家河也

瓊林醉歸圖

金羈細馬出明光碧色羅衣錦繡香行過玉河三百騎少年
爭說李東陽

田按天順七年癸未二月會試棘闈火八月再試取
吳欽等二百四十七人至甲申乃舉廷試東陽二甲
第一年最少僅十七

張泰

八首

泰字亨父太倉人天順甲申進士選庶吉士授檢討

遷修撰有滄洲集十二卷

升菴集張亨父詩句清拔名於一時其正月十六日
詩云長安元夕少燈光此夜歡娛覺更忙十里東風
吹翠袖九門銀燭照紅粧虹橋御陌爭春步雲閣誰
家閨晚香醉著吟鞭急歸去老夫當避少年狂其手
書稿懷於先師李文正公處見之
南濠詩話張修撰亨父工於詩嘗歲晚與翰林諸公
聯句有云生事殘年話風流後輩誇竟以是月卒亦
詩識也

用韻答陳克敬杏花下作

春來幾花開過春幾人復爲花主人臨風問花花不語一片
已墮青溪蘋我有春詞爲花發韶華瞥眼春江雪花時不抱
花影眠孤負青天送明月

贈別蔡時中溫州佐府

南客之官去浙東永嘉山水儘相容
城當斗口雲生壘寺落江心浪打鐘
松院一琴同吏隱花時五馬勸春農
未應別駕淹高足漢署人多識蔡邕

爲鎮江唐一敬題一泓亭

江郭喧喧此室幽當階一水淨涵秋
晴看細浪搖花幔夜吸寒星落茗甌
未惜草書供渴兔最愁橫吹起潛虬
題詩爲問唐清叟還許濠梁作勝遊

長門春思

露重花垂泣煙深柳暗顰如何清禁裏有此斷腸春

京中咏春

輦路輕塵撲馬鞍
酒房花市繡成團
一家樓榭東風裏
多少春愁隔畫欄

海城春望

一帶浮光界遠田
數枝花柳簇春煙
誰家酒幔招人醉
搖蕩東風出樹巔

題畫

遠山隔樹高於隴
墜石當溪響亂泉
欲脫塵衣此中去
滿庭黃葉抱秋眠

二陸來酌聞隣家絃索聲

酒淺燈寒醉不成
隔牆絃語若爲情
太平兒女中原樂
不是蛾眉出塞聲

謝鐸四首

鐸字鳴治太平人天順甲申進士選庶吉士授編修
歷侍講南國子祭酒擢禮部侍郎卒贈禮部尚書諡
文肅有桃溪淨稿八十四卷

麓堂詩話謝方石出自東南人始末之知爲庶吉士
時見其送人兄弟詩曰坐來風雨不知夜夢入池塘
都是春爭傳賞之學詩自來風雨不知夜夢入池塘
此月讀古詩則凡翰林官課及應答諸作皆古詩故
其所就沈著堅定非口耳所到既其老也每出一詩
必令予指疵不指不已及予有所質亦傾心應之必
使盡力予嘗爲匡山詩內一聯渠意不滿予以爲更
無可易渠笑曰觀子胸中似不止此最後曰廟堂遺
恨和戎策宗社深恩養士年渠又笑曰微我子不到
此子又爲端禮門古樂府渠以爲末句求盡往復再
四最後乃曰碑可毀亦可建蓋惜事久乃見不見姦
黨碑但見姦臣傳渠不待辭畢已躍然而起矣方石
古樂府最得古意如過河怨曰過河過河不過河奈
此中原何夜半檄曰國威重空頭敕相權輕夜半檄

皆警句也

詩談天台謝鐸剛毅英華焉用藻飾

美南蓉塘紀聞桃溪謝文肅公鐸有順天鄉試錄次

韻寄潘時用詩云又是西風桂子秋不聞仙錄上瀛

洲青燈入夜西涯老誰復朱衣為點頭末注云時西

涯李學士為考官而時用不第豈非命哉蓋時用與

西涯平生最相知者時用名辰後以薦舉官至太常

三台詩錄文肅既歸路過新河有軍笑之曰有官不

會做有錢不會接文肅聞之笑曰軍其知我哉遂賦

一絕云五陵裘馬日更新白髮歸來苦愛貧除卻新

河軍識我平生知己更何人亦前輩一段佳話也

白楓河

白楓河河水滿地流紅波波聲入海爭盪摩蛟螭夜泣愁鼉

鼉嗚呼壯士可奈何白骨兩岸高戕戕君不見河之水深不

極至今中有銜冤石

三台詩錄元季方氏之亂陳仲廣率族人禦戰白楓

河不勝憂憤而卒世無知者公特表章之

病起

病起風光四月過蕭蕭雙鬢不知幡驚心午飯還宜粥入眼
春衫盡換羅筋力轉妨騎馬怯路岐生見出門多百年夢覺
今如此一笑青山奈爾何

麓堂詩話陸鼎儀嘗言謝方石詩好用夢字及一笑
字察之果然閒以語之亦一笑而已不易因憶張亨
父嘗言杜詩好用眞字豈所謂許渾千首溼杜甫一
生愁者雖古人亦不能免耶

謁侯城里有感

欲向西風酹一尊乾坤何處著英魂百年事過風前燭千古
名留海上村香火半龕誰地主孫枝一葉是君恩夕陽滿地
傷心淚付與江流自吐吞

孝女湖

丁甯湖上人莫汲湖上水中有孝女淚下徹重泉底

倪岳 一首

岳字舜咨錢塘人徙上元尚書謙子天順甲申進士
選庶吉士授編修歷侍讀遷學士拜禮部侍郎進本
部尚書加太子少保歷南吏部兵部入掌吏部卒贈
太保謚文毅有清溪漫稿二十四卷

田按文毅父謙謚文僖有明父子得謚文自倪氏始
文毅詩才不逮文僖而政績遠過之

晚泊流河

迢迢客路近流河漁浦風晴起棹歌夾道短籬村巷小兩行

疏柳夕陽多

劉大夏 二首

大夏字時雍華容人天順甲申進士選庶吉士改兵部主事歷員外郎中以忤閹繫獄尋出爲福建參政進廣東布政使改浙江擢副都御史治張秋河進戶部侍郎兼左僉都御史理宣府兵餉移疾歸起右都御史總制兩廣軍務拜兵部尙書加太子太保賜歸以忤劉瑾逮繫遣戍肅州赦歸卒贈太保諡忠宣有

東山集

何孟春燕泉集劉東山公晚年肅州之謫雖由逆瑾其實公同年焦閻老芳爲之公與焦素無他焦特忌公名耳岑猛賂旣行瑾集大臣議欲冀公重辟諸大臣憚不敢吐一語獨都御史居公鏞曰劉某何罪必欲文致之瑾怒明日大臣以居議奏瑾謀於焦及吏部尙書劉宇又素嫉公者習劉某輕議夷人遷徙發遣戍瑾初擬廣西邊衛焦曰是送彼歸也乃定肅州公西行稿載公赴肅州時故舊皆避不來會獨鄉

人嚴仲洪贈詩公和答之公過六盤山寄西涯閣老
詩末句云寄語同年老知已天涯孤客幾時還歎同
年也後歸自六盤和前韻未句云憑誰寄語中州子
前度劉郎今已還中州子焦與劉也其事蓋如此
雙齋詩話劉忠宣公平生不刻意作詩間有爲而作
者皆事核意真情到興具如撫諭田州句云如何萬
頃桑麻地天與夸人作戰場雖土官岑溥亦感也出
錦衣獄中有句云紅塵未了清時債白髮重來此地
遊蓋公爲兵部郎中嘗下獄也謫戍甘肅過六盤山
句云綠野誤爲三品地白頭今到六盤山蓋以爲終
於侍郎不起未必有此謫也謫所示子姪句云報國
未能平海宇充軍終是累兒孫蓋以逆瑾有劉某永
遠充軍之批旨也又云猶有先朝宣召夢急趨黃屋
面承恩蓋思孝廟君臣相遇千載一時雖在謫所不
忘情也謫所贈同事詩曰時事何人苦變更遶城持
戟半儒生蓋劉瑾用事士大夫有罪多謫謫甘肅也
田按忠宣一代名臣詩
非所留意語特軒爽

再登重陽菴

山徑迂迴又一菴白雲深處暫停驂遊人對景心偏適遠客

懷鄉意豈堪十載官情淹薊北半生歸夢在江南孤臣敢負君恩重深恐經綸未素諳

和同遊陸大參韻

雲山何處是歸期老去偏憐宦況微作客未離煙水地行囊先製芰荷衣吳山地近紅塵少楚澤尊香紫蠚肥今日共君須盡醉白頭相與會應稀

陳音一首

音字師召莆田人天順甲申進士選庶吉士授編修
歷侍講遷太常少卿進本寺卿有媿齋集

田按師召與顧東江居相鄰近於牆上作綸竿以便投詩名曰詩釣東江有詩紀之云巧心文思孰兼長詩釣詩成又幾章千里浮沈謝江路一竿風月共鄰牆君如緣木求魴鯉我正懷磚想珮璫畢竟兩無名

利念五湖煙
水舊同鄉

送潘栗夫

二十年前舊弟兄
離亭尊酒不勝情
蜀山渺渺知何許
清夜相思只月明

吳希賢

三首

希賢字汝賢莆田人
天順甲申進士選庶吉士授檢討
歷修撰左諭德遷南侍讀學士有聽雨亭稿

送上人還莆

十載關河雲水蹤
忽驚春雨偃嚴松
傳來西竺千年法
歸聽南峯五夜鐘
錫響吳山驚虎豹
杯浮閩海護魚龍
題詩我憶曾遊處
落日曇花意萬重

倪元鎮畫

春草湖邊浪拍航
篷窗日午坐焚香
此翁老去雲林在
枯樹荒亭幾夕陽

咏梅送熊通政

江南春色別來久
夢繞梅花思不禁
何似拂衣歸去好
小齋明月夜橫琴

郭璽一首

璽字文瑞城武人
天順甲申進士選
庶吉士改兵部主事

送王惠民

故鄉憐久別
奉詔喜南還
草色都門道
潮聲潞渚船
清風隨

去鷁明月滿前川
伫看來春暮鵬搏萬里天

倪輔一首

輔字良弼平湖人天順甲申進士授吏部主事改禮部
歷官湖廣參政有類劇遺稿

徐州

山中雲散千年氣
隄上人耕百戰場
瘦馬獨行回首處
冷煙斜日似咸陽

沈棨一首

棨字元節平湖人天順甲申進士授工部主事歷潮
州延平臨江知府遷貴州參政有願貞集

橋李詩繫元節詩文冲澹
純雅五言古得柴桑風氣

送友歸省

江天雨繁霜水落見層石北風捲地來寒色晚逾劇之子戒行李詰朝問鄉國青雲多故知而深此離惜我懷亦何爲兀兀殊未釋一官慚素餐十年久爲客甘旨願已違雙親況垂白家弟昨致書海潮害秋穫因之欲奮飛安得晨風翼

林榮一首

榮字孟仁番禺人天順甲申進士授監察御史遷福建按察副使

薊門聞笛

冒寒重到塞垣遊羌笛悠悠起戍樓應有開元遺譜在月中三弄小梁州

官廉一首

廉字汝清平度人天順甲申進士官戶部郎中有薊

東集

和戈主事勉學韻

相逢歧路際話別酒尊間遠樹迷前浦停雲繞暮山離襟連
日苦塵鞅幾時閒回首蒼龍閣隨君有夢還

桑悅三首

悅字民懌嘗熟人成化乙酉舉人除泰和訓導遷長
沙通判改柳州有思立集十六卷

田按民懌跋唐詩品彙云唐人詩三百餘篇大抵賦
多而比興少句多而意少其傑出者陳子昂李太白
杜子美韓昌黎四家耳併唐三百餘家之意不如陳
李杜韓四家併陳李杜韓之意又不如阮籍咏懷詩

漢古詩數十首可謂知要第其所作利鈍雜陳妄自
矜詡宜爲前人詆訶其訓導泰和也李文正贈詩云
十年三度試春闈親見聲華滿帝畿甲第人慚唐李
邵奇才終誤宋劉幾功名歲晚非蓬鬢湖海官貧尙
布衣試看孤鷹下林落壯心還向碧天飛憐才之意
溢於言外

八月二十二日過分宜昌山洪見一巨蛇長二丈餘雙

角嶄然衆夫驚呼潛其首尾脊角獨露冉冉而逝作

詩志異

扁舟晚亂昌山洪巨蛇雙角疑潛龍隨流徐入巖穴中薄雲
慘慘吹陰風季秋陽蟄龍德窮非時小見蜥蜴同投荒偶覩
眞奇逢天意示此非夢夢震澤秋水涵虛空先生盍歸採芙蓉
醉弄文墨誅長虹

贈蕭時清

十里螺湖如掌平
開門正挹滄浪清
偶逢道士贈丹訣
閒課山童鈔酒經
畫長燕子飛入戶
春盡樹陰鋪滿庭
近來聞說有奇事
賣藥修琴曾到城

過陳巨濟國賓家

醉眼昏昏醉墨斜
題詩閒過晉卿家
朱簾十二無人捲
風定園林自落花

文洪一首

洪字功大長洲人
成化乙酉舉人官涑水教諭有括囊稿二卷

田按涑水以名德重不以詩見長自敘其詩云如春山早鶯初出深谷舌弱語澁不能成聲古人之不自矜詡如此

菊存坡

杪秋風氣肅繁霜被原野采采黃金花盈盈尙堪把會心卽
欣然何必東籬下

明詩紀事

貴陽陳田輯

丙籤

羅倫一首

倫字彝正永豐人成化丙戌第一人及第授修撰坐論事貶泉州市舶提舉起南大理評事就遷修撰正德中贈諭德諡文毅有一峯集十卷

四庫總目倫文剛毅之氣形於楮墨詩亦磊砢不凡

施閏章螻蛄詩話世傳羅一峯起用時哭友詩有九

原若過南陽李爲報羅生已復官子疑其忿狹不類

一峯偶問施偉長則御史薛之綱輓廬陵陳莊靜者

也其詩云學士先生早蓋官莊歌聲裏路人歡填門

客散名猶在附郭田多死亦安鹽井已非今日利冰

山不似舊時寒九原若過南陽李爲報羅生已復官

蓋陳不協鄉評又嘗與李同齡齡羅公者也

田按彝正謫提舉後起南大理評事見菽園雜記可
據以補史缺

林緝熙歸會於薌城梁宅和洪城見寄

雲水千峯更萬峯此心期與故人同蒼茫世路浮生在澹泊
看杯野興濃鄉夢幾同茆店月蓑衣無恙柳花風明年喚取
陳公甫卓帽青天信一篷

程敏政 三十二首

敏政字克勤休甯人成化丙戌第二人及第授編修
歷左諭德少詹事兼侍讀學士以事罷官尋起復改
太常卿仍兼侍讀學士進詹事再進吏部侍郎贈尙
書有篋墩集九十三卷

殿閣詞林記孝宗時尤重經筵學士程敏政記其事
云弘治元年三月十二日初開經筵賜宴及白金寶

銓十三日文華後殿早進讀尚書孟子及午進讀大學衍義以爲常講畢賜茶上皆呼先生而不名四月
二十八日以後屢賜桃杏郁李蓮房鮮荷青梅枇杷
楊梅雪梨鮮藕敏政等具表稱謝且記之以詩有曰
黃封盡帶乾清字朱實平分上苑香七月二十日
華殿後講上顧中官賜講臣冠帶鞞袍敏政預賜
金雲雁緋袍一副金帶一及烏紗帽皁鞞面謝訖上
顧訓曰先生辛苦咸對曰此皆職分當爲頓首而退
有詩紀之云日映眾恩曉殿清湛恩稠疊駕親臨
衣紅湓天機錦束帶黃分內帑金久幸清班容宜履
漸漸華髮點朝簪經生職分尋常事消得君王念苦
辛
查慎行人海記劉文靖以程篁墩短其不能詩衡之
釀成廷鞠之獄李文達之賺葉文莊亦以疵其詩文
之故二公賢相也其器量狹小乃爾
田按克勤少慧四川巡撫羅綺以神童薦英宗召試
命賜食即日賦聖節及瑞雪詩并經義各一篇援筆
立就文采粲然詔讀書翰林大學士李賢妻以女弱
冠成進士學問該博爲一時冠數遭黜未竟其用
篁墩集存詩甚夥擷其精華不愧一時作者特以燕
莫不剗爲世訾議亦可
爲存詩太多之誠云

十一月偶至南山黃落頗甚夜宿開雨作

清溪淺可涉朔氣動原野數日與山別殘菊不盈把多病恆
鮮歡新菊謝杯斝夜寒夢屢續涼雨忽鳴瓦俯仰天地中流
光疾於馬紛紛歲將晏稍幸世緣寡上想雲谷仙幽懷浩難
瀉

謁京口魏勝將軍廟

長風吹山磯落日下京口桓桓魏將軍廟食此邦久土馬賸
儀衛金書炫庭牖忠義夙所欽再拜酌江酒憶當宋社南君
臣竄身走將軍起田間意氣最雄赳孤城江海上日日事攻
守中原天弗界竟爾墮戎醜前旌曉不揚雄劍夜空吼何人
始召亂志士徒殞首當時百戰場荒落見沙柳

過鄭公釣臺

余忠宣公
隸字刻石

相公湖邊一拳石截斷湖光三百尺射蛟人去今幾年誰掃
雲根看遺蹟師山先生性愛山偶然得此青孱顏臨流坐釣
不知晚漁樵並載扁舟還武威余公天下士特與先生題篆
字良工刻入斷崖傍遂使溪山增勝事一朝海內風塵生兩
公死國如弟兄平生隱顯雖異迹竹帛同垂千載名薰風雨
過潮初落足躡蒼苔俯幽壑釣絲已逐野煙飛字畫多爲古
藤絡師山之節峻且孤武威之字人爭摹忠賢遺蹟衆所寶
泉石清奇何處無

蘇墨亭

百步洪有東坡石刻云郡守蘇軾山人張天驥詩僧

道潛月中遊十六字沒水中三百年矣水部主事尹
君廷用得而昇之作亭以覆曰蘇墨亭予凡七過其
下不能措一詞成化丙午秋歸自南畿念終不可已
乃勉成數語留亭中且以寄尹君時予族姪孫楚英
方同知徐州并書以贈之

蘇墨亭前七回過春水茫茫懶收舵公輪門下難爲工縱有
新詩不成和高秋水落百步洪登亭如見蘇長公大書深刻
十六字橫姿逸態生長風黃樓東來水如注野僧山人舊知
遇石瀨潺潺月滿天彷彿當時舊遊處題名一去不復還風
雨剝落莓苔斑水神淵客那敢闕至寶有時歸人間行河郎
官訪遺蹟摩挲愛此羊公石百夫昇出泥沙中搨本相傳驚

再得風流太守惠政多
築隄兩岸高臺我由來物與人俱重
墨妙紛紛知奈何

題吳廷端太守山水障

蒼山突起浮雲中
湖光百頃磨青銅
底須飽看卧遊錄
入眼已覺紅塵空
何人卜築依山住
一任飛雲挂庭樹
下瞰澄江作小亭
正據溪山最佳處
柴扉盡掩呼未開
石牆夜雨生莓苔
門前有人問奇字
短擢日攜春酒來
對岸溪橋大於瓮
寒潮漸滿沙頭遲
農家地僻少通車
僧舍樓高屢聞磬
村脊有粟爨有薪
忘機魚鳥相情親
山林豈博鐘鼎貴
優遊最愛漁樵人
竹鶴老翁今已矣
半副生綃映窗几
風致公然似欽西
歸興蕭蕭隔千里
練水屏山今所無
故鄉之樂不可孤
相期

歲晚結新社飽玩天開眞畫圖

宋理宗賜福王與芮雪景爲鄭村汪宗裕題

瑤峯玉樹瑤坡寶祐墨本來宣和天山羝乳紇干雀此景
此意將何如御筆中題福王字生綃上遺龍圖志鳳山日永
萬幾輕廊廟幾人同受賜天人想像冰雪顏好文亦自非等
閑詔書屢表漉洛緒詞翰卻在陳隋間三百年來驚物換散
落塵寰充一玩摩挲爲賦懷古篇安得虹光射霄漢

贈劉太古

瀟灑劉太古絕似鮑參軍老去詩還健情多酒未醺疏髯飄
亂雪長嘯過行雲何日開春社巖花約共分

松蘿山

雙峽中分一徑通
寶坊遙隔片雲東
四時山色涵空翠
萬折泉聲瀉斷虹
清愛竹孫穿凍雪
靜聞松子落香風
登高兩屐吾方健
攜手無因得贊公

李員外應禎吳太守原博約遊虎邱

日散林霏見虎邱
故人清約此閒遊
望深綠樹知藏寺
吟徧青山始繫舟
塔院風來花似雪
劍池春到水如油
酒闌不盡吳中勝
老衲相招更倚樓

揚州

江日輝輝下廣陵
客邊吟興偶然增
宋軍水砦多編戶
隋帝離宮半屬僧
鵝鴨似便春雨數
樓臺爭出暮雲層
往來總覓承平福
莫問從前幾廢興

病中齋居兼謝西涯學士見過

倚榻蕭然不出門，坐聽宮漏幾黃昏。
暑留巾襪齋心慣，病卻茶瓜藥禁存。
竹簡有情時共閱，楸枰無侶但空捫。
故人秉燭能相訪，踏破閑階碧蘚痕。

次韻原博論德

抱病經旬未入朝，齋居秋思轉寥寥。
坐憐白日繩難繫，起望青山手可招。
夢繞川原疑脫騎，瘦便風露愛聞蜩。
詩壇故事誰先續，倚席長慚郢上謠。

劉諫議祠

老樹陰森護廟門，尙疑生氣塞乾坤。
衣冠死愧千言策，俎豆公宜百世尊。
旻歲牛羊山下塚，東風桑梓道旁村。
匡時不盡

平生恨白日悠悠逝水奔

送辨如海上人遊松江

霜鴻將盡一帆開
遠別難勝老辨才
郢客未分新社約
吳僧先掃舊經臺
枯腸臘供芟畦菜
白足春遊了徑苔
聞說木蘭花未老
晚香盈握待師來

客請遊望湖亭修碧軒不及往次韻

西望湖天半日程
擬鄭寒綠洗塵纓
一灣路隔紅塵遠
五月涼生白芷輕
山寺茶煙衝鶴起
石門空翠逼人清
春來遙憶憑闌處
萬頃鷗波夕照明

送陸文量武選赴浙江參政

同榜悠悠感歲華
晨星落落散天涯
除書又拔吳中俊
處世

眞如海上槎內史之官先過里宣公封事久名家南歸欲訪
巢居閣肯檄林僧一供茶

廣陵驛下與表兄林文秀倉使夜酌

二十四橋春草平月明依舊滿蕪城繁華百代底須問邂逅
一樽無限情去國浪傳金馬客倚樓誰送玉簫聲孤帆又作
江南別坐聽船鐘報五更

楊村道中

幾處吹煙認水村數聲山犬吠籬門寒天日落明鴉背荒歲
田空剩草根垂澗石如牛馬飲排雲山似筍旌屯眼中無限
詩情在欲對沙鷗了一尊

吊梅宛陵

詩墨猶傳草木馨
煙雲長鎖舊池亭
魂遊宛下空秋月
客散河陽幾曙星
崑體戰降孤幟赤
都官名重一衫青
晚生欲附宣州派
慚愧牛轅逐鳳軒

松崖爲縣人胡昭題

老髯踞石幽且貞
喜君卜居若平生
三更滿地星月碎
九夏半空風雨生
知心晏歲竹連鴈
過眼一春花滿城
廡苔有約幸無拒
杖策來尋猿鶴盟

和答吉安顧天錫太守同年

離菊新黃百草枯
天涯相憶共朝餽
一緘秀句題鈴閣
千里虹光射鏡湖
致主有才淹老守
全身無策笑庸夫
喜聞述職行將近
幾日風帆過直沽

留別濟甯周同守

憶在成都視席同天涯相望幾秋鴻
君生向我五年長行色困人三月中
宦海積薪隨上下客途飄梗定西東
艤舟不盡牽情處太白樓前柳絮風

送釋方策住善權寺

上刹新開住辯才一舟南去水如苔
再傳衣鉢詩宗遠終日溪山畫障開
草沒仙人燒藥竈花明丞相讀書臺
病夫久欲捐暈飲春焙還能數寄來

早過車田村

沙岸深穿石徑幽橘梢藤刺翠相樛
孤村路出荒垣近十畝陰蟠古木稠
樵釣半灣松崦脚水椿遙響竹棚頭
息肩少狎

羣鷗坐不覺涼生兩袖秋

弘治辛亥歲仲冬念五日在萬山觀作

城頭霧歛青天開平地忽見雙蓬萊捲簾下瞰白雲起拂手
近招黃鶴同一龍擎石樹根古萬弩射潮風壑哀鍊師縱爾
能謝客容我到城須一來

題雜畫

青山寂無人空波澹流水垂楊不勝春搖搖蘸清泚

留雲亭

亭子臨孤絕江雲礙不飛時來簷下宿水氣濕僧衣

山水小畫爲張尙相題

山色青於染松陰掃未開水邊芳草地才見兩人來

與謝子期閒步至北山莊作

與客尋源過石梁水車遙認北山莊
鷗邊一陣東風起吹落桐花滿澗香

會昌雪亭公子許雨中移竹詩以訊之

八尺庭除半綠苔一春無意買花栽
幾時憑仗連朝雨分得青鸞數尾來

送戶部葉叔通郎中知甯國府

宛陵祠下竹娟娟一榻曾分聽夜泉
攜酒寓公誰復在六回春色到吟邊

沈石田小景

雨晴山麓上蘼苔老木亭前捲畫開
城市愛閒應更少水邊

才見一人來

黃仲昭 一首

仲昭名潛以字行莆田人成化丙戌進士改庶吉士
授編修坐諫鰲山煙火予杖謫湘潭知縣遷南大理
評事進寺副乞休弘治初起江西提學僉事尋致仕
有未軒集十四卷

升菴文集宋時御前內宴翰林撰致語八節撰帖子
雖歐蘇曾王司馬范鎮皆爲之蓋張而不弛文武不
能百日之蜡一日之澤聖人亦不之非也成化中黃
編修仲昭莊檢討景不撰元宵詞又上疏論列以去
以此得名然自是而後內外隔絕每有文字別問停
門有文華門仁智殿輩每得美官至蠶政害人易若
仍舊之愈乎愚謂於麗語中寓規諫意如六一公玉
輩經年不遊幸上林花好莫爭開君王念舊憐遺族
長使無權保厥家亦何不可
田按成化三年憲宗將以元夕張燈命詞臣撰詩詞

進奉仲昭與編修章懋檢討莊景諫張燈豈翫舜之
道詩詞豈仁義之言乞將煙火停止帝以元夕張燈
祖宗故事仲昭等妄言竝杖之闕下左遷其官時修
撰羅倫先以言事被黜人稱翰林四諫檢程克勤第
墩集有元夕觀燈應制詩云五朝故事傳來久樂與
民同上是百載過邊燧不驚天氣和古來張弛皆有道
賞心一日非為多未免近於迎合上旨矣

送人還莆

兩京飄泊幾星霜
刳喜逢君話故鄉
潮水不知離別苦
又從江上逆歸航

章懋一首

懋字德懋蘭谿人成化丙戌進士改庶吉士授編修
坐諫蕭山煙火謫臨武知縣改南大理評事進福建
僉事致仕起南國子祭酒再乞休復起南太常卿南

禮部侍郎皆不就卽家進南禮部尙書卒贈太子少

保謚文懿有楓山集四卷

劉永澄耶中雜記章德懋庶吉士時閣老劉定之爲
教習一日以玉堂蔬圃詩試諸士德懋結語曰賢哉
公儀休拔卻園中菜劉以輕薄目之後又試中秋賞
月賦德懋云天下之人有罹悲愁羈患貧窮孤寡者
見月則不樂惟高官厚祿身享太平之日者見月則
樂也劉愈怒之後章以諫煙火詞得貶斥而劉遂不

救

靜志居詩話嘗見思陵御書一幅詩云未央鐘動曙

光生隱隱初聞柳外鶯風靜御爐香篆細日高斧坐

袞衣明螭頭陛擁黃麾仗豹尾班聯白玉珩最喜及

時勤庶政蒼蠅聲裏聽雞鳴眞迹存高上舍作鉅處

觀者疑爲思陵御製實楓山集中詩也惟及時二字

集本作君王御筆更之是楓山一集曾歸乙夜之覽

矣附識於此以當開寶舊事

田按文懿以清望重一時不欲以文藻見長余檢其

集有禁中聞鶯詩云不隨舞袖歌金縷卻伴仙韶奏

玉墀長信夢同欹枕處瑣闌吟

罷倚闌時未嘗不清麗可誦也

別閩南僚友

三年憲府同懷抱此日離亭惜解攜回首建溪溪上路春山

隨處鷓鴣啼

張弼十四首

弼字汝弼松江華亭人成化丙戌進士授兵部主事

歷員外出爲南安知府有東海集九卷

東海集成化壬寅九月旣望石齋先生白沙陳獻章公甫應詔起而之京道過南安而太守東海居士華亭張汝弼欲用曹參禮蓋公故事款留於周程吟風弄月臺上數月以受教石齋不可曰當不俟駕矣今方度嶺又值積雨裝弗亟辨容與數日耳東海不能強石齋有詩曰玉枕山前逢使君西風吹破玉臺巾巾乃石齋自製類華陽巾直方而無襞積者東海簞簞斷斷論議或有戾於其道而云破此巾也遂以一絕激之曰白沙村裏玉臺巾不耐風吹易染塵莫笑烏紗隨俗態宋廷章甫是何人石齋復以玉枕山詩

曰一枕橫秋碧玉新金熬間上見嶙峋使君得此原
無用賣與江門打睡人跋曰東海居士詠玉臺中梅
我大甚口占玉枕山詩答之東海和答曰炎瘴多收
一雨新獨看天柱山聲嶙峋橫秋玉枕真無用自是乾
坤不睡人天柱山亦南安之照山也故自依天柱以
玉枕與石齋順其意耳而又作二絕句云客裏羞澁
客衣單欲買南安玉枕山縱有枕頭那得睡雞聲催
入紫宸班寄語江門打睡人而今天地正芳春覺來
莫管閒花鳥須掃崑崙頂上塵
麓堂詩話張東海草書名一世詩亦清健有風致假
髻曲等篇皆為時所傳誦嘗自評其書不如詩詩不
如文又云大字勝小字予戲之曰英雄欺人每如斯
不足信也
李滌樹渚集華亭張汝弼詩文俱自成家草書天趣
逸發論者推為一代冠冕觀其送子弘宜會試詩云
直道遜詞真要訣權門利路是危機可以見其為人
詩談張弼清俊明珠數顆舉世寶之
姜南玉庄日記成化間妖人王臣者跛一足人稱王
癩子遊食京師以左道事中貴得授錦衣千戶請為
上台大丹以採藥為名與中貴偕出川廣直隸兩浙
等處買辦搜索寶玩需求珍異民不堪命巡鎮大臣
莫敢誰何有司官吏願指氣使奔命不暇及回京為

各處巡撫守令交章飛劾而科道併彈於是上大怒
 斬臣首傳詣所歷地方令民心大快初臣至廣東南
 安守華亭張東海目覩其驕橫作詩嘆曰過嶺囊箱
 下湖船丁夫日夜少安眠薄田蕩盡猶輸稅惡客時
 來橫索錢窮髮東南皆赤子舉頭西北是青天不才
 無計甦民困食祿乘軒自赧然
 武進縣志雲間張汝弼有盛名赴南安郡守道經毗
 陵時陸詹事簡方得告南歸張訪之適展墓不見乃
 索紙筆題一絕於陸世經堂有始知東閣先生貴不
 放南安太守參之句陸歸急追之已行遠矣
 震澤集張汝弼詩多警句往往為人傳誦其草書尤
 多自得酒酣興發頃刻數十紙疾如風雨矯如龍蛇
 欽如墮石瘦如枯藤狂書醉墨流落人間雖海外之
 國皆購其蹟世以爲顛張復出也
 田按東海詩有豪氣不受羈勒七言斷句尤推擅場

假髻曲

東家美人髮委地辛苦朝朝理高髻西家美人髮及肩買妝
 假髻亦戢然金釵寶釧圍朱翠眼底何人辨真偽天桃窗下

來春風假髻美人歸上公

雲間雜識張東海作假髻曲諷刺時貴當路銜之出守南安不得調而歸邵二泉作輓詩云張公不作南陰相蓋後忌公人是愛公人

養馬行

領馬易養馬難妻子凍餒俱庭孱若有芻豆且自殍安能養
馬望息蕃平原草盡風色寒羸馬散放聲嘶酸忽然倒地全
家哭便擬賠償賣茅屋茅屋無多賠不足更牽兒女街頭鬻
鄰翁走慰不須悲我家已鬻兩三兒

田按陸文量菽園雜記云國初馬養於各苑馬寺各監苑而已永樂中始以官茶易和林等處馬養之民間謂之茶馬正統十四年京師有警乃選取以備軍資養於順天府近京屬縣謂之寄養騎操馬及京師無事寄養之馬不復散去至今遂爲故事每歲孳生賠補之法悉與各處茶馬無異養馬之家雖已量免

糧差而賠補受累者多其最害事者牧馬每歲不通
淫而孕謂之飄沙新樂縣一家養此馬每三年賠二
駒九年已賠六駒產已廢矣東海此詩可以相證陸
清獻稱東海養馬行諸詩用意深遠與杜子美兵車
行諸作相表裏有天下國家
者所不可不知辰非虛矣

夏仲昭畫行

君不見輞川王郎鐵鉤鎖漁陽塵飛竟摧墮君不見江南李
主金錯刀澄心堂紙同煙銷宋家寫竹文與蘇不求文字稱
士夫息齋板刻不足數房山尙書特奇古俱隨物改世見稀
我朝好手尙屬誰九龍山人王友石毫素爭先化工力當時
揮洒未足珍於今一紙千金值太常清卿得真傳風流瀟灑
與差肩宛如指活妙書法陽冰古勁張旭顛紫宸朝迴寫此
幅遠近縱橫萬枝玉鴈鵠吟雨下江皋猿猱號煙度巖曲湘

靈瑤瑟廿五粒淒淒切切如流泉長日相看竟忘寢箇中妙
趣難言宣乃知此老真奇絕飽弄清風與明月古來數輩皆
其儔興酣還隨芭蕉寫

東臯堂爲宣興王景昇賦

荆溪東下白雲鄉五斗先生舊草堂蔬圃幾弓連町疇稻田
百畝接陂塘魚兒浦口酒船小燕子風前茶焙香應笑東華
塵土客馬蹏終日爲誰忙

渡江

楊子江頭幾問津風波如舊客愁新西飛白日忙於我南去
青山冷笑人孤枕不勝鄉國夢敝裘猶帶帝京塵交遊落落
俱星散吟對沙鷗一恰神

王

三

董其昌畫禪室隨筆張東海題詩金山西飛白日忙
於我南去青山含笑人有一名公見而物色之曰此
當為海內名士東海在當時以氣節重其書學醉素
名動四夷自吳中書家後出聲價少減然行書尤佳
今見者少耳

和江源一韻

半醒半醉寫烏絲卻憶南安對酒時玉面阿童鸚鵡舞青山
小吏鸚鵡詩曲江池畔秋風早鐵漢樓頭落日遲聞道使君
重過此此情應與水同馳

棠溪景

白露宿寒塘寒塘浸明月懊惱少年心分明鏡中雪

觀泉

山巘高低如繡溪流屈曲無聲幽人閉戶不出門外小橋自

橫

題畫

石磴縈紆直又斜上方樓殿隔煙霞孤舟倚岸無人渡嘯鳥
聲中自落花

雨飲

花朝風雨阻清遊便躡棕鞋上小舟白髮周郎留共飲大吳
橋下酒如油

守南安柬招張直

五羊城裏半詩仙袂接神交三十年綠髮張生最年少好來
鈔我紫霞篇

琳湖

琳湖湖上草堂幽四面窗涵一鑑秋軒冕紅塵飛不到竹牀
高枕對沙鷗

寄金陵王尚文

司諫王郎我舊知薛逢詩句李愬棋曾從虎口中閒過贏得
歸來兩鬢絲

王中舍蘊和所畫團扇

素紈團扇王郎畫竹石霜柯慘淡中謂是誰家舊時物幾回
烈日幾涼風中國古無摺扇嘗見王秋澗記元初東南夷使
者持聚頭扇當時譏笑之我朝永樂初始有特
僕隸下人所持以便事人耳及倭國充貢太宗徧賜羣臣內
府又倣其制以供賜予天下並徧用之而團扇廢矣今江南
惟婦人猶存其舊題團
扇因著摺扇之緣起云

陸深春風堂隨筆今世所用摺疊扇亦名聚頭扇吾
鄉張東海先生以爲貢於東夷永樂間始盛行於中

國子見南宋以來詩詞詠聚扇者頗多予收得楊姝
子所寫絹扇面摺痕尙存東坡謂高麗白松扇展之
廣尺餘合之止兩指許正今摺扇蓋自北宋已有之
倭人亦製爲泥金面烏竹骨充貢出自東夷果然
田按耶瑛七修類稿謂成化初高麗貢摺扇至朝
命倣製以答復書格言以賜羣臣高江村天祿識像
亦謂聚頭扇揮灑翰墨始於成化間予檢曾榮西墅
集有交趾削竹黏紙爲摺扇以充貢永樂乙未夏命
中書舍人寫傳格言於上以賜百官詩云捲霧舒霞
疊水紋中官掣出御前分溪藤蕭颯裁新樣汗竹參
差綴古文爽氣尙含鮫室兩墨香偏染鳳池雲極知
當暑清肌骨願播仁風答聖君則揮灑翰墨不自成
始矣

賀欽一首

欽字克恭廣甯後屯衛人成化丙戌進士授戶科給
事中謝病歸弘治初以薦起陝西參議不赴有騭問
集九卷

田按弱閩山人師事陳白沙才華不及白沙而騰煥驚實過之

簡鄉人

搗壺欲就名園賞借問如今春淺深但得紅芳飛未盡便來
枝下聽鳴禽

林瀚一首

瀚字亨大閩人成化丙戌進士改庶吉士授編修歷
修撰諭德祭酒進禮部侍郎改吏部進南吏部尙書
改兵部以忤劉瑾謫浙江參政瑾誅復官贈太子太
保謚文安有泉山集二十五卷

田按文安世有清德子庭樞庭機孫煥煥皆官至尙
書庭機煥並得謚文又皆爲國子祭酒一家五尙書
三祭酒三世謚文非獨明代僅見古亦罕有其倫也
余檢李西涯集有賀文安得子詩云三鳳豈須誇薛

氏八龍今已半荀家縱極力頌
揚安能預測子姓如此之盛耶

越王臺懷古

乘閒獨上釣龍臺
滿目興亡事可哀
宋主行宮惟綠草
越王舊業半蒼苔
樓船東去家何在
陵谷春深花自開
山色不知風景別
還從江上送青來

陸容十七首

容字文量太倉州人成化丙戌進士觀政工部授南
吏部主事改兵部歷員外郎中出爲浙江參政有式
齋稿浙藩稿歸田稿三十七卷

菽園雜記予未登第時未嘗作詩餘天順己卯赴會
試夢至一寺老僧出卷求題予爲一闌與之旣覺猶
記其半云一片白雲人留不住一坐湖山人移不去
翠竹吟風蒼松積雨此是怡情處及下第歸讀畫海

甯寺僧文公出白雲窩卷求題宛如夢中癸未會試
嘗夢人贈詩云一篙春水到底渾入指不見波清痕
霹靂爲我開天門至期貢院火蓋術家有霹靂火之
名而到底渾不見痕如其兆矣
田按參政與張亨父陸鼎儀稱婁東三鳳所著菽園
雜記王守溪稱爲明代說部第一平生不以詩名而
學問既博掇其佳篇究非專語性靈者所得比擬參
政自言登第後始作詩餘而靜志居詩話云式齊登
第後始爲詩豈未
細檢菽園雜記耶

送鼎儀

匍匐歸故里歡愉非昔時時窮天弗閔心痠醫難治人欺鬼
神侮四體失自持所賴諸友生相將慰吾私清談碧酒盡偶
坐白日移隱憂爲之解春陽煦寒澌君茲忍予棄感觸成傷
悲文詞雜點竄經史紛轡疑于時跨門出躑躅將誰之敢云
巷無人而君故相知前秋別亨甫戚戚心已危今春當君別

騷屑愈不支平生頗剛腸不解惜別離邂逅有此態瑣瑣成
何爲得非情意迫無乃志氣衰我辰將無良早歲逢百罹壯
心半隳墜似與林壑宜君誠青雲器夙抱經世資良時不易
得壯齒難久羈匡濟當自此行矣無遲遲

發鄞縣

孤眠愜曉涼登舟已云晏推窗望海隅日出煙未散雲山相
吐吞冉冉青不斷冥搜起遐思興到幘一岸涼風從何來吹
我鬢絲亂時無謝康樂居然發長歎

和李賓之止詩之作

陶翁謝麴生作詩示終止平生匪徇外此舉尤近裡昨聞詩
止詩一哂西涯子感時公是非遇事竊憂喜詩本具性情觸

之卽興起耽溺固可悲力止亦非理操觚與擲筆要在必由
已適意無勞神如此而已矣君看杜拾遺病肺泯江涘生無
濟世功藉此名干祀

城西草堂

抱藝客侯門歸來樂自存草堂幽傍郭花塢曲通村靜坐閒
書帙閒情付酒樽侯羸今已矣心事與誰論

次孫汝貞韻

檢點牀頭舊酒樽煖來花下喚詩魂歌魚不逐人彈鋏題鳳
從教客過門粉署看雲眠白晝畫樓邀月坐黃昏廟堂身世
江湖樂一飯難忘聖主恩

磧嶼寺限韻

移舟來看九峯青古寺幽深試一經
畫堵半昏支碧殿殘碑
欲斷倚朱櫺階前老樹知僧臘
海上浮槎仰使星極目湖天
詩興遠片雲孤鶴過華亭

桐江夜行

櫓聲搖月下桐江短夢驚回午夜長
道路勞人自甌越雲山
送我到錢塘還家正及迎春宴
隨俗先愁賀歲忙行過釣臺
天已曙巨鰲須爲覓漁航

過公主廢宅

金屋重重瑣翠苔東風依舊燕飛來
鳳簫聲歇春無主牢落
宮花幾度開

僊人宮

野樹無名花氣香古碑橫卧薜痕蒼僊人已去空陰洞滿地
白雲春晝長

題畫

餘寒歷盡見春工一樹疏梅霽雪中破履短筇詩自好不知
吟過小橋東

南郊

卧擁明衣席未安齋郎早已報登壇君王行處陽春在不用
靈犀避夜寒

紅梅

面面春紅試曉粧天然肌骨耐冰霜東坡居士如相識肯熱
銀燭照海棠

題畫

林屋重重枕野塘
水花千頃一歸航
何年了卻公家事
來趁山人幾日涼

杏花便面

海霞薰染玉容酣
不逐東風上舞衫
記得春來曾識面
相公莊在午橋南

海甯道中

溪上漁人已曬罾
晚風吹浪碧層層
不知歸去了幾女
浮蘋如船坐採菱

臨安道中

修篁高樹綠依依
路繞青山見日稀
城市炎風吹不到
只愁

空翠濕人衣

將之新城復經於潛

青山高下綠陰稠
觸暑登程且未休
莫笑癡兒了公事
從容只作看山遊

韓文一首

文字貫道洪洞人
成化丙戌進士授工科給事中
出爲湖廣參議歷山東參政雲南布政使擢右副都御史
巡撫湖廣改河南入拜戶部侍郎改吏部進南兵部
尙書改戶部以劾劉瑾罷官瑾誅復職加太子太保
贈太傅諡忠定有忠定集四卷

田按忠定詩音調高爽在錦衣獄時與劉忠宣唱和不綴入服其量

題送別卷爲張汝振致政還蘇州

翩翩車騎送君行路指東吳萬里程秋水長天渾入畫暮雲
春樹總關情身閒已遂吟邊樂官好還留去後名林下優游
無箇事任將詩酒樂餘生

潘禎一首

禎字應昌天台人成化丙戌進士官山東僉事

麓堂詩話陳公甫論詩專取聲最得要領潘禎應昌
嘗謂予詩宮聲也予訝而問之潘言其父受於鄉先
輩曰詩有五聲全備者少惟得宮聲者爲最優蓋可
以兼衆聲也李太白杜子美之詩爲宮韓退之之詩
爲角以此例之雖百家可知也予初欲求聲於詩不
過心口相語聞潘言始自信以爲昔人先得我心也

看菊

獨憐九日在天涯夢繞東籬海上家千里一官空白首十年

雙眼又黃花

陸淵之 一首

淵之字克深上虞人成化丙戌進士選庶吉士改禮部主事出爲敘州知府終河南布政使有東臯集十三卷

寄章德懋

嶺月江雲望眼枯美人猶自客南都別來多少知心語臨到封題一字無

張海 二首

海字文淵德州人成化丙戌進士授給事中歷都給事中順天府丞出知鶴慶府遷太僕寺卿罷歸起兵

部侍郎謫山西參政

山左明詩鈔弘治時吐魯番侵哈密命文淵往經畧
條上六事因言遠方不可加兵來則撫之去則拒絕
之而已得命閉嘉峪關捕誅通番回夷而還孝宗以
其無功謫山西參政攻李西涯送文淵詩云營平圖
略本常事定遠功名非彼曹空庭搗穴豈不易不忍
赤子塗脂膏閉關卻使法亦有重念王業經營勞亦
可見當時朝議所在非文淵之過也其後遂用師遂
虜不久復爲所據勞而無功文淵固未爲失策矣

春閨曲

二首

小窗睡起坐來慵寶鴨香銷錦帳空可惜好花容易謝憑將
一笑買春風

夢回繡枕啟窗紗簾幙風輕燕子斜不信閒愁春不管平分
一半與梨花

林克賢 一首

克賢字一中黃巖人成化丙戌進士官福建僉事

卽事

落日荒荒照女牆輕陰閣雨過西廂無情最是新巢燕猶自
雙雙語畫梁

戴縉一首

縉字子容南海人成化丙戌進士除監察御史歷尙
寶司少卿擢右僉都御史進右副都御史右都御史
掌院事遷南工部尙書黜爲民

田按尙書以附利任
直取敗詩頗明秀

夜泊武昌

奉節臨湘水維舟近楚城月明山大吠夜靜水禽鳴戀闕心

尤切思家夢未成何如訪仙侶投老學長生

明詩紀事

貴陽陳田輯

丙鑑

張昇一首

昇字啟昭南城人成化己丑第一人及第授修撰歷
贊善諭德庶子以劾劉吉調南工部員外吉罷復官
遷少詹擢禮部侍郎進尙書忤劉瑾謝病加太子太
保致仕卒贈太子太傅諡文禧有集三十六卷

四庫總目張昇文禧集前有邵寶序謂此集本名柏崖
集刻成而賜諡之命適至遂以名之明史本傳不言
有諡或偶漏歟

與人話舊

逌迤逢君坐月輝
泊舟柳下近山扉
不知玉笛來何處
吹起鄉心逐雁飛

董越 三首

越字尙矩甯都人
成化己丑第三人及第
授編修歷侍讀庶子
太常少卿擢南禮部
侍郎進南工部尙書
卒贈太子少保諡文
禧有集四十二卷

四庫總目朝鮮賦一卷明董越撰孝宗卽位越以庶子同刑科給事中王敬使朝鮮因述所見聞以作此賦又用謝靈運山居賦例自爲之法所言與明史朝鮮傳合知其信而有徵非鑿空也

重泛大同江

樓船重泛出通津
細細晴波漾麴塵
翠柳亂搖絲髮娜
青山倒浸碧嶙峋
壺觴又勸歸來客
詩句難留過去春
卻怪鳬鷗

似相識水濱沙際往來頻

送邵文敬

二首

思南太守我同年吏隱東曹筆似椽曾有清詩膾人口半江帆影落樽前

筆退如山未足多門闌鐵限尙來過不知萬里黔中地還有

山陰道士麼

邵珪

五首

珪字文敬宜興人成化己丑進士授戶部主事歷員

外郎中出爲嚴州知府有半江集六卷

麓堂詩話邵文敬善書工碁詩亦有新意如江流白如龍金焦雙角短之類又有半江帆影落樽前之句人稱爲邵半江開變蘇書答之跋云予亦以蘇書戲效東曹新體邵誤以爲效其詩作依字韻抵于首句

日東曹新體古來稀此意茫然失所歸字掇坡書聊
共戲詩於豈法敢相譏休誇驥裏才無敵未必葫蘆
樣可依卻問基塲諸國手向來門下幾傳衣相與大
笑而罷
堯山堂外紀邵半江一日題陳圖南小像云盤陀石
上淨無塵岳色江聲共此身莫怪吳儂渾不醒百年
俱是夢中人詩成求質於李西涯西涯給之曰尚有
一二字欠穩待予更之西涯乃默記竊為已有先題
遣上後邵公見之撫掌大笑
田接文敬以百曹郎將出守思南李賓之陸鼎儀徐
謙齋有送邵思南序倪舜咨有南園別意記賓之諸
人有南園別意聯句云送客南莊秋色清羣芳酒
花事總闕情黎常長材用事須為郡吳希賢野興
人慣出城李東陽好憶行囊詩卷富倪岳還看遠
驛舟迎楊時暢黑頭太守黃金重陸武汗竹應垂
載名陳音文敬有留別詩云焚道山川非禹州壯懷
都屬望京樓親分符竹永天寵遠藉珠璣託俊遊古
道未能忘一硯宦情今已付孤舟迂疏滿貢羣公意
翻笑謀生拙似鳩賓之次韻云微外天留萬里州送
君無賴倚高樓閒野草札供餘興盡閱江山壯遠遊
紅樹夕陽深駐馬碧溪芳草漫隨舟人生巧拙渾閒
事莫更重論鵲與鳩董尚矩亦有送別詩見前一時

翰藻紛紜其實文敬以半道丁艱去未嘗至吾
黔也文敬在當時稱好事詩筆亦雅令滿酒

觀杜氏畏山

平生負奇癖愛山看不足十日陽羨遊曾未飽饑目驚看米
顛家乃有此巖谷浮嵐似九疑幽思舍湘竹靈源洞七澤春
溜濕楚綠纖雲起膚寸變態不可逐傳聞太華巔謫此玲瓏
玉巨靈惜不得失守鬼夜哭焉知斃幾牛聞道歸應速當時
蘇老泉卻詫枯楠木茲山迴奇絕屹然當我屋春來饒樂事
遞賞壺尊續紀勝屬非才豪吟當刻燭但愧梅二丈吾詩豈
堪錄

九鷺圖

江沱水落沙尾長蒹葭白露秋作霜蓼叢蓮葉亦蕭索渺渺

澄波秋有光晚風吹斷寒雲脚天高氣清入寥廓飄然白鷺
從何來一樹梨花鏡中落倉皇兩隻殊苦飢窺見寒魚爭逐
之一隻仍飛欲來止一隻偃宿何葳蕤其餘五隻紛離立相
喚相呼隨所適日短江空意自閒應憐此地無矰弋嘆息良
工多苦思滿堂風露秋淋漓夢斷江南渺何許撫視徒令楚
客悲

無錫聽松寺復竹茶爐和秦武昌韻

此君只合對臞禪淪沒重經甲子年茗椀詩瓢情脈脈松風
水月夢娟娟風塵瀕洞誰能識湖海歸來信有緣珍重武昌
秦太守大篇珠玉爲誰傳

送宜興僧琛公

法藏寺前春草生
斬蛟溪上暮雲平
十年薄宦違清賞
此日送君空復情
社燕秋鴻浮世夢
煮茶燒筍石林盟
西風一葦滄江遠
看取東南佛日明

寓新塘雜咏

夏雲重疊晚猶奇
江館追涼也自宜
欲放扁舟過別渚
荷花菱葉雨絲絲

屠勳三首

勳字元勳平湖人
成化己丑進士授工部主事
改刑部歷員外郎
中南大理寺丞
進大理少卿
擢右副都御史
巡撫順天
召拜刑部侍郎
改左副都御史
復爲刑部侍郎
歷右都御史
進刑部尙書
忤劉瑾引疾求

去加太子太保致仕卒贈太保謚康禧有太和堂集

六卷

田按康禧以政事名詩亦雅飭

遊西郭園池

遠山含雨黑雲稠詩到林泉景更幽野寺可能添一榻水田應只欠雙鷗風光入眼渾無賴塵事驅人且未休唯有杜陵豪氣在盡將花鳥賦春遊

再遊南山

門出清波一掌平宜煙宜雨又宜晴
泥絮絮漫漫下蕩日
遊絲裊裊輕蓬島只疑雲咫尺江山好是
靈分明園林無地無春色漫道東風不世情

題蔣文藻扇

數竿修竹綠猗猗
水石翛然物外奇
誰遣林塘落君手
畫圖相見一題詩

周璫 五首

璫字梁石蒲田人
成化己丑進士授廣德知州遷禮部郎中出爲撫州知府收鎮遠歷四川參政擢布政使有翠渠摘稿七卷

蒲陽文獻梁石文章渾深雅健有根底詩格調高古書初學晦翁變爲奇勁田按梁石與陳白沙講學旨趣不合晚與黃未軒修興化府志持議亦抵牾自號蒲陽拘史詩擬古音節極合律絕亦饒風趣

猗蘭操

維山有谷露瀼瀼兮維谷有蘭揚孤芳兮我行四方荆棘蔽
野採芳而佩知蘭實寡我思文武于鎬于豐欲往從之路阻
不通吾道非矣掩袂漣而與世違矣

邵武道中夜宿半山鋪

邵武城南路行行重苦辛高山雙倦足空館一愁人涼月照
華髮西風吹敝巾長安一萬里何處是通津

早春出郭呈祁石阡

侵晨出郭喜聯鑣馬首人家入望遙雲暝孤城微見堞雪消
春水欲平橋山田鳴雉麥猶短野箔初蠶桑未條經國有謀
勞相度擬將封事上清朝

神樂觀張道士乞詩

金爐火煖養丹砂
滿院靈光含紫霞
野鶴不鳴春晝永
玉笙吹落碧桃花

爲葉左參題畫

短短桃花點綠莎
輕輕白鳥下晴波
宛然西塞山邊路
只欠能詩張志和

楊先溥 六首

先溥字文卿沂水人成化己丑進士官山西按察副

使有沂川集

田按文卿詩有閒適之趣
覺柴桑風景去人不遠

村居漫興

老去常昏飯支離
仗酒全存亡驚故友寒暑感流年
書映松

窗月茶烹土銕煙一琴高挂壁陶令任無絃

六十

短髮垂肩白蹉跎六十年乾坤歸老眼歲月付癡禪嗜酒劉
玄石耽詩孟浩然採薇應亦足無事祝蒼天

春日村居

鋤罷園蔬又治田陰陰榆柳蔭堂前市沽頓積頻年債午夢
眞成小洞仙幾葉漁舟春水渡一聲樵笛夕陽川回思車馬
紅塵路卻恨歸來已暮年

初歸

組紱勞生兩鬢星歸來笑殺草堂靈秋風蘿蔓迷樵徑春水
桃花失釣汀滸洗久慚龜手藥養生新買種魚經等閒睡醒

茅檐日坐看山中草樹青

夏日卽景

黃梅時節雨初晴半畝槐陰小院清卻怪山童驚夢覺午風
吹送搗茶聲

春歸

酒肆逢春屢典衣一年無奈又春歸好花落盡桃千樹幾日
山人不啟扉

陳紀一首

紀字叔振閩人成化己丑進士選庶吉士改監察御史歷陝西按察使進僉都御史巡撫宣府召爲副都
御史

圖通寺

翠微雲樹擁亭院俯嵯峨路轉天梯上人從木杪過澗煙眠
白鹿山雨濕青蘿應識禪堂近鐘聲向晚多

馮蘭一首

蘭字佩之餘姚人成化己丑進士選庶吉士仕至江

西提學副使有雪湖集

姚江逸詩佩之在京師與李西涯謝木齋三人雅相
好木齋歸田與佩之倡和無虛日間書之以寄西涯
西涯亦一一和之有云惟因雨巾履長得夢中遊又
云羨君江海上一和有舊同遊是時西涯爲一世宗工
而於佩之敬爲老友佩之西涯同有樂府詠史號爲
新體今西涯樂府已流傳佩之無有能舉之者矣以
靜志居詩話謝木齋以宰輔歸田與佩之締姻日以
詩札酬報澶淵劉應徵知餘姚縣事爲刊湖山唱和
詩二卷集中句可採者謝如嘉客不來虛掃榻好山
難致卽移家路當樹與雲深處舟及湖隨月上時野

色遙連晴樹杪秋聲忽動暮鴉羣樓臺月上寒雲盡
村巷泥乾宿雨餘扶老最便方竹杖入秋卻愛早禾
田馮如鏡裏流年從老去山中舊業得生還遠林近
照明村落斷岸分流入海田絕頂夜晴先見日中峯
春煖易生雲雨疏籬落菊開晚水涵湖田雁下遶秋
晚菜畦依水種日斜村姬過鄰春雲中僧住茅茨屋
雨後人耕斥鹵田沙淨雨苦無屐齒竹深秋墅有棋
聲雷遠忽作三更雨江海疑生六月冰燈火誰家無
樂事江湖此夜有離人其
詩頗難優劣洵同調也

贈鍾欽禮

一笑天顏豈偶然清癯真似老神仙更教歸去應勞夢何止
呼來不上船城市已無蹤迹到江山合有畫圖傳蕭蕭短髮
寒吹帽載鶴西湖雪後天

用按欽禮以繪事徵值仁智殿孝宗常
以老神仙呼之此詩首二句紀其事也

丁鏞三首

鏘字鳳儀上元人成化己丑進士授南刑部主事歷

員外郎中出爲興化知府有石厓集

田按鳳儀耽詩尤愛佳山水生平多出宿山寺栖託清曠焚香對書顏然自適出守興化能折疑獄推爲神明金陵詩徵第錄一詩不足見所長余從周翠渠弘治興化志獲詩數首亟登之

遊廣化寺

嶺路肩輿側側行寒泉泱泱映衣明蒼松蟠屈歲華古白鳥
高飛羽翼輕題字暫留遊宦蹟看山少緩故鄉情前年記得
登牛首石磴分明雲際橫

重遊廣化寺

山與石崖叟豈應有夙緣愛山有佳句時時崖上鏘

月峯院

青山碧樹一重重
偶爾看雲到月峯
卻悔塵緣消未盡
那能長聽上方鐘

曹時中 一首

時中名節以字行松江華亭人成化己丑進士授刑部主事歷浙江按察僉事改雲南進浙江副使

雲間志畧時中喜爲懷素書與吳門沈石田不識面而詩筒往來不絕一夕夢與石田執手永訣不數日而訃至錄石田爨所寄詩若干篇爲神交集

雷嵩

夜雨桃花漲春風楊柳灣
數船燈火亂知是打魚還

李晟 一首

晟字孔陽濮州人成化己丑進士授監察御史改本

院照磨終郎陽同知

寄彭總戎

昔年曾出玉門關帝命重來鎮黑山
宛馬盡輸龍種至番城無警虎牙間
籌邊方叔心逾壯草檄陳琳鬢已斑
枹鼓不鳴胡騎遁將軍塞上射鵬還

呂憲一首

憲字秉之秀水人大學士原子以蔭授中書舍人乞
與試中成化辛卯舉人歷禮部郎中南太僕少卿遷
南太常卿有九柏存稿六卷

川按九柏詩實憲少韻特勅於
學與劉文和子欽並稱於時

送崇信伯奉使還朝

開國風雲委慶長使還龍節正煌煌館甥初識汾陽第揖客
能容汲黯狂癡裏葡萄浮大白廐中苜蓿飽飛黃朝廷一飯
思頗收忠孝毋忘守四方

李仁傑 一首

仁傑字唐英莆田人成化壬辰第二人及第授編修
漁梁遇雨

西風秋氣冷況復雨淒淒鳥道藤蘿濕人家煙火迷雲深川
谷暝溪漲野橋低對此堪惆悵孤猿何處啼

文林 二首

林字宗儒長洲人教諭洪子成化壬辰進士除永嘉
知縣改博平遷南太僕寺丞出知温州府有文温州

集十二卷

答啟南見寄

綠水縈紆四山周山深雲合叫輶輶坐吟春草思靈運卧看
飛鷺感少遊竹馬愧非前度客虎符空綰一方憂因君更重
鄉關念滿目煙波怕上樓

李少卿貞伯寓龍泉菴奉懷

美人掉首西山去談笑何由一霎同多在紫薇泉石畔煮茶
暢飲落花風

鄧庠二首

庠字宗周宜章人成化壬辰進士授行人遷監察御史出爲河南副使進接察使歷廣東廣西布政使擢

右副都御史總督南京糧儲收巡撫河南遷南右都御史就拜南戶部尙書有東溪稿十卷

田按尙書無詩名而五字詩特疏爽

游泐溪石室

頻年役簿書偶此息塵鞅出城松徑陰刺水秧鉞長驕陽蒸初夏漸有踏冰想石室泐溪上一竅透天盜襲公屹崇碑樂事傳自巖曲竇遠禪牀張炬窮幽賞苔痕步履輕巖溜琤琤響出洞濯清風翛然天籟爽可當眞都遊佳境幸無黨

蒼梧江行

殘雨滴疏梧蒼江水墨圖暮雲迷島嶼沙鳥宿荻蒲路險憂羣盜民貧望賜租王師何日下一爲掃榛蕪

楊榮一首

榮字時秀餘姚人成化壬辰進士官工部主事有和

唐音

詩談楊時秀和唐音煞有風致

姚江逸詩都冰工於詩會試舟中取唐音和之月餘

成帙書學懷素尤善畫竹

號宮送河丞市馬

野色正蒼蒼秦山半夕陽雕弓雙羽箭寶劍百金裝夜月臨

關白秋雲壓塞黃君休市千里當亡漢文皇

高昂二首

昂字尊卿莆田人成化壬辰進士官六安知州有和

唐鼓吹集

田按楊時秀和唐音高尊卿和唐詩
鼓吹一時風尚爾爾高詩較楊工甚

淺歆臺和許惲韻

歌舞三千夢不同春風依舊掃行臺
青山似怨蛾眉老芳草曾承翠輦來
離燕有情還自語野棠無主爲誰開
斷碑文字多零落猶自摩挲玩古苔

長洲懷古和劉滄韻

獵獵西風吹劫灰荒基猶是舊樓臺
長江無際青山出返照微明白鳥來
壓酒吳姬還解笑行吟楚客不勝哀
停車欲問前朝事淺渚蘆花幾度開

胡超一首

超字彥超湯溪人成化壬辰進士官工部員外有恥

卷六
三
菴稿

咏懷

東籬有佳菊
淡然幽素姿
終懷林壑韻
不生桃李時
亭亭白日晚
湛湛寒露滋
寂寞冰霜後
此意竟何爲

林壑一首

壑字世調
閩人成化壬辰進士
歷吏部郎中
終廣東布政使
有雙松集

潯陽驛

潯陽江上日
初斜
蕭瑟西風亂
荻花隱隱菱歌起
愁思月明猶似訴琵琶

蕭瑟一首

顯字文明山海衛人成化壬辰進士授兵科給事中
出爲鎮甯同知改衢州遷福建按察僉事有海釣遺
風

田按文明在諫垣有直聲上疏陳時政斥神奸左道
語甚激切出官鎮甯同知馬東田寄詩云聊復題詩
寄遠入天涯一別幾晨昏玄都觀裏非前度武德年
中有謠言瑣閣尙懷同出入燕鄉深喜獨生存始知
去住皆君賜莫道南遷不是恩

題小景

碧樹俯清流高人愛獨坐讀罷發長吟不知斜日墮

張敞一首

黻字兼素吉水人成化壬辰進士授涪州知州擢後
軍都督府經歷以言忤旨謫石州知州改師宗

儀真述懷

親見朝廷政令新
小臣私計轉憂民
一言真忤九重聽
萬死猶存七尺身
沙上白鷗閒笑我
鏡中華髮苦催人
十年揚子江三渡
今日何須更問津

姜南風月堂雜識吉水張徹任涪州知州清介公明
不畏權貴擢都督府經歷時見素林公俊爲主事以
忠諫下獄徹上章救之亦逮下獄三原王端毅公時
爲都御史疏言二人忠亮勸上納諫旌直以隆治道
宜復從徹職以慰天下之望上怒解二人皆謫外補
徹得石州尋收師宗行至儀真述懷云云一時傳誦
之